

## На хвалитех

### стихиры, на 4, глас 8. Самоподобен:

**1. Стих:** Хвалите Его на силах Его,/ хвалите Его по множеству величества Его.

**2. Стих:** Хвалите Его во гласе трубнем,/ хвалите Его во псалтири и гуслех.

**О** пресла́внаго чудесе́!/ Живоносный сад, Крест пресвяты́й,/ на высоту возносím является днёсь:/ славосло́вят вси концы земни́и,/ устрашаются де́монския полки́./ **О** каковый дар земны́м дарова́ся,/ и́мже Христе спаси души на́ша, // яко Един Благоутро́бен. **[Дважды.]**

**3. Стих:** Хвалите Его в тимпане и лице,/ хвалите Его во струнах и органе.

**О** преславнаго чудесе́,/ яко грозд испо́лнен животá,/ понёсый Вы́шняго,/ от земли́ воздвигаем Крест ви́дится днёсь,/ и́мже вси к Богу привлеко́хомся,/ и пожерта бы́сть до конца́ сме́рть./ **О** Дре́во пречестно́е,/ и́мже восприяхом во едеме безсмертную пи́щу, // Христа сла́вяще.

**4. Стих:** Хвалите Его в кимвалех доброгласных, хвалите Его в кимвалех восклицаня./ Всякое дыхание да хвалит Господа.

**О** преславнаго чудесе́,/ широта Креста и долгота небеси равна́ е́сть:/ яко Божественною благодатию освяща́ет вся́ческая./ **О** се́м языцы варварстии побежда́ются,/ о сем скиптры царей утвержда́ются,/ о божественныя ле́ствицы,/ е́юже восходи́м на небеса́, // возносяще в песнях Христа Го́спода.

### Слава, и ныне, глас 6:

**Д**несь происходит Крест Госпо́день,/ и вернии приемлют того желáнием,/ и берут исцеления души же и тела, и всякия болéзни./ Сего целуим радостию и стра́хом,/ страхом греха ради, яко недостойни сущё:/ радостию же спасения ра́ди,/ еже подают миру на том пригвоздивыйся Христо́с Бог, // имей вéлию милость.

**И славословие великое тихо и согласно поют.**

**П**оему же великому славословию, облачится настоятель во всю священную одежду, и приемлет кадильницу с фимиамом, и приходит ко святей трапезе, и кадит честный Крест крестообразно, и взимает его на главу, и исходит северными дверьми, предыдущим ему со двема лампадами даже до Царских

**врат, и тамо став ожидает конца славословия и Трисвятаго. Сему же скончану, возглашает настоятель велегласно:**

**Премудрость, прости.**

**Мы же начинаем тропарь, глас 1:**

**Спаси Господи люди Твоя,/ и благослови достояние Твое,/ победы [православным христианом] на сопротивныя даруя,// и Твое сохраняя Крестом Твоим жительство. [Трижды.]**

**И приходит настоятель, нося на главе честный Крест до среды церкви пред святыя Царския двери: тамо убо уготовану аналогию, полагает верху его честный Крест, и кадит крестообразно. Таже творит поклоны три до земли, в койлибо буди день, и взем честный Крест с благовонными василками, на подножии Креста обложенными, станет пред аналогием зря к востоком.**

**И диакон возглашает велегласно во услышание всех: Помилуй нас Боже, по велицей милости Твоей, молимся Тебе, услыши нас Господи, и помилуй, рцем вси.**

**И начинаем первую сотницу: Господи помилуй, 50: знаменующу настоятелю в начале честным Крестом, трижды. Таже преклоняет главу, елико пядию отстояти главе от земли, и помалу воздвигается горе даже до скончания втораго, 50, Господи помилуй. Егда же доспеет до 97, Господи помилуй, возвышает глас свой еклисиарх, настоятель же прямо стоя, и конца сотницы ожидая, знаменует Крестом паки трижды.**

**Таже обращается к западной стране. И глаголет диакон: Еще молимся о милости, жизни и оставлении грехов великаго господина и отца нашего Святейшаго Патриарха Алексия и господина нашего преосвященнейшаго епископа [или архиепископа, или митрополита] [имярек] и всего о Христе братства нашего, о здравии и о спасении, рцем вси. И начинаем вторую сотницу, Господи помилуй. И творит настоятель второе воздвижение, якоже преднаписася.**

**Таже обращается к полуденной стране. И глаголет диакон: Еще молимся о Богохранимем стране нашей Российстей, о властех и воинстве ея, да тихое и безмолвное житие поживем во всяком благочестии и чистоте. И начинаем третью сотницу, Господи помилуй.**

**Скончаваемей же той, обращается настоятель к северной стране. И глаголет диакон: Еще молимся о всякой души христианстей, скорбящей же и озлобленней, здравия, спасения, и оставления грехов требующей, рцем вси. И начинаем четвертую сотницу, Господи помилуй. И бывает четвертое воздвижение.**

**И обращается настоятель к востоком. И глаголет диакон: Еще молимся о всех служащих и послуживших во святем храме сем [или обители сей], отец и братий наших, о здравии и о спасении, и оставлении грехов их, рцем вси. И начинаем пятую сотницу, Господи помилуй. По пятом же воздвижении, поем:**

### **Слава, и ныне: Кондак, глас 4:**

**Вознесыйся на Крест волею, / тезоименитому Твоему новому жителству, / щедроты Твоя даруй Христе Бóже, / возвесели силою Твоею верныя люди Твоя, / победы дая им на сопостаты, / посóбие имущим Твое, оружие мiра, // непобедимую победу.**

**Поему же сему, полагает настоятель честное древо Креста на аналогии, и поет тропарь сей во глас 6: Кресту Твоему поклоняемся Владыко, и святое воскресение Твое славим. Трижды. Поющим же и братьям тойже тропарь начинает кланяться настоятель, и творит метания два пред честным Крестом, таже целует его. По целовании же творит паки едино метание, такожде и на оба лика по единому метанию. По сем приходят братия вся: по чину поклоняются, и целуют честный Крест.**

**Поем же и стихиры, дондеже совершится целование.**

### **Стихиры Честнаго Креста, самогласны, глас 2:**

**Приидите вернии, животворящему Древу поклонимся: на немже Христос Царь славы волею руце распростер, вознесе нас на первое блаженство, яже прежде враг сластию украд, изгнаны от Бога сотвори. Приидите вернии, Древу поклонимся, имже сподобихомся невидимых враг сокрушити главы. Приидите вся отечествия языков, Крест Господень песнями почтим. Радуйся Кресте, падшаго Адама совершенное избавление: о тебе бо вернейшии царие наши хвалятся, яко твоею силою исмаильтеския люди державно покаряюще. Тя ныне со страхом христиане целующе, на тебе пригвоздившагося Бога славим, глаголюще: Господи, на том пригвоздивыйся помилуй нас, яко Благ и Человеколюбец.**

### **Глас 5:**

**Приидите людие, преславное чудо видяще, Креста силе поклонимся, яко древо в раи смерть прозябе: сие же жизнь процвете, безгрешнаго имущее пригвожденна Господа. От Негоже вси языцы нетление вземлюще зовем: Иже Крестом смерть упразднивый, и нас свободивый, слава Тебе.**

### **Глас тойже:**

**Глас пророк Твоих, Исаии и Давида, исполнися Боже, глаголющий: придут вси языцы Господи, и поклонятся пред Тобою: се бо людие, иже Твоя Блаже благодати наполнишася, во дворех Твоих Иерусалима. Крест претерпевый за ны, и воскресением Твоим животворяй, сохрани и спаси ны.**

### Глас 6:

**Ч**етвероконачный мир днесъ освящается, четверочастному воздвигаемому Твоему Кресту Христе Боже наш, и рог верных христиан совозносится. Тем врагов сокрушаем роги, велий еси Господи, и дивен в делех Твоих, слава Тебе.

### Глас тойже

**П**ророков гласи Древо святое предвозвестиша, имже древния свободися клятвы смертныя Адам, тварь же, днесъ возносиму тому, совозвышает глас, от Бога просящи богатыя милости: но единый в благоутробии, безмерный Владыко, очищение буди нам, и спаси души наша.

### Глас 8.

**Г**лас пророка Твоего Моисеа Боже, исполнися глаголяй: узрите Живот ваш висящъ пред очесы вашими. Днесъ Крест воздвигается, и мир от лести свободяется: днесъ Христово воскресение обновляется, и концы земли радуются, в кимвалех Давидски песнь Тебе приносяще и глаголюще: соделал еси спасение посреде земли Боже, Крест и воскресение: ихже ради нас спасл еси Блаже и Человеколюбче, всеильне Господи, слава Тебе.

### Глас тойже:

**Д**несъ Владыка твари, и Господь славы, на Кресте пригвождается, и в ребра прободается, желчи и оцта вкушает, Сладость церковная: венцем от терния облагается, Покрываяй небо облаки, одежду облачится поругания: и заушается брэнною рукою, рукою Создавый человека. По плещам биен бывает, Одеваяй небо облаки: заплевания и раны приемлет, поношения и заушения, и вся терпит мене ради осужденнаго, Избавитель мой и Бог, да спасет мир от прелести, яко Благоутробен.

### Слава, и ныне, глас тойже:

**Д**несъ неприкосновенный существом, прикосновен мне бывает, и страждет страсти, свободяяй мя от страстей: свет подаваяй слепым, от беззаконных устен оплевается, и дает плещи за плененныя на раны. Сего Чистая Дева и Мати на Кресте зрящи, болезненно вещаше: увы Мне Чадо Мое, что сие сотворил еси? Красный добротою паче всех человек, бездыханный, беззрачный являешия, не имея вида, ниже доброты. Увы Мне Мой свете, не могу спяща зрети Тя, утробою уязвляюся, и лютое оружие сердце мое проходит: воспеваю Твоя страсти, поклоняюся благоутробию твоему. Долготерпеливе Господи, слава Тебе.